

四庫全書

集部

欽定四庫全書

晦庵集卷六

宋 朱子 撰

詩

和人遊西巖

平生壯志浩無窮，老寄寒泉亂石中。
閑去披襟弄清泚，靜來合眼聽玲瓏。
不知澗寺晴時雨，何似溪亭落處風。
吟罷君詩自瀟灑，此心端不限西東。

次知郡章丈遊山之韻

前峰鸞鶴去無蹤
邂逅荒尋得故宮
但覺風烟隨意好
便驚塵土轉頭空
提壺命駕幽期遠
授簡哦詩妙處同
安得西山一丸藥
共隨簫鼓向雲中

題周氏溪園三首

循澗闢芳園
結亭對虛壁
澄潭俯幽鑒
空翠仰寒滴
主人心事遠
妙寄塵壤隔
豈為功名期
而忘此泉石
溪亭
危亭竹栢間
悄悄清日幽
絕朔風一以厲
愛此枝上雪
仰悲玄景駛
俯歎羣芳歇
不用此時來
那知歲寒節
雪亭

手種籬間樹枝繁不忍刪
新亭最佳處勝日共懽顏
景晏春紅淺雨餘寒翠潛
光風回巧笑桃李任漫山
嫣然亭

寄林擇之

故人千里寄書來三復塵襟頓豁開
勸我從容深燕養莫將佔畢苦沉埋
杖藜此日應同趣揮麈何時得共陪
珍重相期俱努力自慚殊未竭淵才

送林擇之還鄉赴選三首

青驪去路欲駸駸回首猶須話此心
一別便成三數月

有疑誰講過誰箴

門外槐花似欲黃
高堂應望促歸裝
箇中自有超然處
肯學兒曹一例忙

今朝握手送君歸
馬上薰風拂面吹
不用丁寧防曲學
寒窓久矣共心期

題林擇之欣木亭

危亭俯清川
登覽自晨暮
佳哉陽春節
看此隔溪樹
連林爭秀發
生意各呈露
大化本無言
此心誰與晤
真懼

水菽外一笑和樂孺聊復共徜徉殊形乃同趣

擇之誦所賦擬呂子進元宵詩因用元韻二首
何處元宵好山房入定僧往來衣上月明暗佛前燈實
際徒勞說空華詎可憑還教知此意妙用一時興

何處元宵好寒龕獨寐人月窓同皎皎燈鏡自塵塵靜
鑿通天地潛思妙鬼神却憐迷路子狂走鬧城闈

次韻擇之梧竹二首并呈李通

竹塢深深處檀欒遶舍青暑風成慘淡寒月助清冷客

去空塵榻詩來拓采櫺此君同一笑午夢頓能醒

永日長梧下清陰小院幽自憐風嫋嫋客賦雨瀏瀏作
別今千里相思欲九秋更憐同社友復此誤淹留

擇之寄示深卿唱和烏石南湖佳句輒次元韻

三首

未識南湖景遙欣二子遊賞心并勝日妙語逼清秋
欲携書卷相將買釣舟微吟歸去晚杜若滿汀洲

平湖渺空濶積水暮生寒但見綠千頃不知深幾竿人

間元迫隘世路足艱難若了滄洲趣無勞正眼看

年來年去為誰忙三伏炎蒸忽變涼閱世謾勞心悁悁
塵人空得鬢蒼蒼詩篇眼界何終極道學心期未遽央
安得追尋二三子舞雩風月共徜徉

小詩奉送擇之仁友赴漕臺之招後篇喜趙公
之得士而不敢致私怨焉然別懷黯然不能成
章亦足以見區區也二首

之子論交久深衷兩自知提攜方有賴離索遽成悲聖

處應無數書來肯見私臨分莫惆悵努力共心期
珍重東臺老英聲舊所聞能懷吐哺意豈但枉書勤得
士看如許持心定不羣願言推此志清濁見朋分

擇之賢友歸途左顧示以四明酬唱煥爛盈編
三復咏嘆想見聚遊之樂輒用黃山即事之韻
賦呈擇之兼懷子重老兄順之賢友

十年身卧白雲堆已分黃塵斷徃回不是幽人遺俗去
肯尋流水渡關來三秋風月從頭說千里湖山靚面開

久欲過逢須一快，豈知勞結倍難裁。

夜間擇之誦，師曾題畫絕句，遐想高致，偶成小

詩

一幅瀟湘不易求，新詩誰遣送閑愁。遙知水遠天長外，更有離騷極目秋。

次林擴之開善避暑韻二首

炎官虐焰遍山村，也到蕭蕭柳下門。水玉秋菰那可得，羨君行處午陰繁。

山齋幾日早塵昏欲拂朱絃已憚煩涼意感君持寄我
雨聲花思滿胸存

送林熙之詩五首

君行往返一十里過我屏山山下村濁酒寒燈靜相對
論心直欲到忘言

仁體難明君所疑欲求直截轉支離聖言妙緼無窮意
涵泳從容只自知

天理生生本不窮要從知覺驗流通若知體用元無間

始笑前來說異同

十年燈火與君同
誰道年來西復東
不學世情雲雨手
從教人事馬牛風

古鏡重磨要古方
眼明偏與日爭光
明明直照吾家路
莫指并州作故鄉

春雪用韓昌黎韻同彭應之作

既有陽春曲那無白雪謠
連天飛不斷著地煖還銷
未掩高人戶難齊衲子腰
稍開銀世界漸長玉枝條
興盡

愁烟艇行迷認野橋酒腸渾欲凍吟筆為誰搖殘臘成
三白餘寒又一朝香隨梅葉落輕伴柳花飄神女羞捐
佩鮫人敢獻綃東皇應好事避舍亦相饒

次彭應之餐雪韻

雪水淪清茗自謂絕世清終然犯烟火况復勞煎烹豈
如午霽餘探此竹外楹柘漿發甘和寶盃凝寒晶心胸
既清凉齒頰亦鏘鳴吞腥期永謝飲玉希長生

次彭應之魚樂亭韻

亭前活水破輕冰漸見遊鯈傍石稜老子自知魚樂處
不須莊惠與同登

與劉德明祝濟之胡子寬晚步偶成

雨罷寒逾勁霜威正凜然不知荒徑溼行到野橋邊曠
望情何極徘徊意莫傳清波涵衆影日落暗晴川

劉德明彥集祝弟以夏雲多奇峰為韻賦詩戲
成五絕

出山幾何時歸來便長夏端居心不怡散策長林下

為客厭城市還家辭世紛朝昏何所見但有四山雲
閉門事幽討歲月忽已多客來無可問與君共絃歌
干時本已懶胸次况無奇若問中林趣婆婆祇自知
炎蒸不可奈雲氣滿前峰向夕風吹盡微聞遠寺鐘

仙洲新亭熹名以畫寒紫微張公為書其額判
院劉丈乃出新句輒次高韻二首

聞說藤蘿外神龍舊所蟠壁開十丈峽寫盡一襟寒賞
寄三杯酒歸投六尺竿若無詩律好清絕不成歡

悄倩非人境寒蟬夏已稠陽崖驚素雪午扇怯清秋共
說新亭好真堪妙墨留賞心元不厭仙夢肯來遊時已
聞國
計之

次韻晝寒

行穿危磴盡林表見孤亭澗瀉千尋白峰回四面青塵
襟元落落風腋自泠泠一醉今何許無心賦獨醒

次院判丈晝寒亭韻有懷平父

把酒懷人處幽尋記往時新亭勞指顧勝踐闕追隨為

報層欄出莫憂浮柱歆惟應舊飛雪想象合心知

次判院丈清湍之什

明滅青羅帶周遭碧玉環孤亭感陳迹茂樹喜重攀
與氣琴尊外泉聲枕簟間詩成無寫處絕壁蘚痕斑

遊密菴分韻賦詩得還字

我行得佳友勝日尋名山春山既妍秀清溪亦潺湲
行造禪扉小憇腰脚頑窮探意未已理策重躋攀入谷
翳蒙密俯澗隨泓灣誰將百尺綃掛此長林間雄聲殷

地厚洪源瀉天慳偉哉奇特觀償此一日閑所恨境過
清悄愴暮當還顧步三歎息人生何苦艱

遊密菴分韻賦詩得絕字

閩鄉饒奇山仙洲故稱傑巍然一峰高復與衆山絕傳
聞極目處天水遠明滅萬里條徃還三光下羅列我來
發孤興竟欲躋嵒嶮病骨竟支離何當攀去轍

次韻宿密菴

忽作經宵別胸奇莫與陳暮歸誇得句寒苦頓生春道

義知無數文章自有真它年應共說此日自由身

遊密菴

弱齡慕丘壑茲山屢遊盤朝躋青冥外暮陟浮雲端晴
嵐染襟裾水石清肺肝俯仰未云已歲月如飛翰中年
塵霧牽引脰空長歎曠歲一登歷心期殊未闌矧此親
友集笑談有餘歡結架迫彎碕徙倚臨奔湍共惜前古
秘今為後來觀落景麗雲木回風馥秋蘭林昏景益佳
悵然撫歸鞍諒哉故山好莫遣茲盟寒

游畫寒以茂林脩竹清流激湍分韻賦詩得竹

字

仙洲幾千仞下有雲一谷道人何年來借地結茅屋想
應厭塵網寄此媚幽獨架亭俯清湍開徑玩飛瀑交游
得名勝還往有篇牘杖屨或鼎來共此巖下宿夜燈照
奇語曉策散游目茗椀共甘寒蘭臯薦清馥至今壁間
字來者必三讀再拜仰高山懍然心神肅我生雖已後
久此寄齋粥孤興屢呻吟羣遊幾追逐十年落塵土尚

幸不遠復新涼有佳期幾日戒征軸宵興出門去急雨
遍原陸入谷尚輕埃解裝已銀竹虛空一瞻望遠思翻
感慙袒跣躋攀冠巾如膏沐雲泉增舊觀怒響震寒
木深尋得新賞一蕢今再覆同來况才彥行酒屢更僕
從容出妙句珠貝爛盈甬後生更疊疊俊語非碌碌吾
纓不復洗已失塵萬斛所恨老無奇十毫真浪禿

聞季通德明諸友入山以詩迎之仍請先往觀

瀑布

勝友南窓底看書老歲華不因寒瀑響肯到野僧家古
徑開能久新亭去豈賒躋攀那可緩寂寞有雄夸

次觀瀑布韻

快瀉蒼崖一道泉白龍飛下鬱藍天空山有此真奇觀
倚杖來看思凜然

和李通畫寒韻

萬壑爭流處十年樹石幽危亭因我作勝日為君留酒
笑紅裙醉詩慙雜珮酬尚嫌心境窄更約九垓游

次韻謁忠顯劉公墓下

理亂由來今古同，覆車那肯戒前蹤。
紛紛誤國人無數，不昧丹心獨此公。

次李通畫寒亭韻二首

不信高懷與世殊，清游試問與誰俱。
相將靜聽潺湲水，洗滌塵襟肯自污。

山行前後有光輝，撲撲浮嵐翠染衣。
直到仙洲奇絕處，畫寒亭下白龍飛。

飲清湍亭石上小醉再登晝寒

水邊今日共傳杯多謝殷勤數子來三伏炎蒸那有此
百年懷抱頓能開雲山合匝還生霧雪澗崩騰怒吼雷
却恨蒼屏遮遠目凌風直欲跨蓬萊

次清湍亭韻二首

上下青山今白頭穿雲入塢未能休因君去覓仙洲路
却歎周南獨滯留

仄徑穿雲欲造天未妨停策聽涓涓知君便有刀頭意

莫忘仙洲澗底泉

立春大雪邀劉圭甫諸兄遊天湖

同雲被四野寒氣慘悲涼回風一以定密雪來飄揚時
當冬候窮開歲五日彊蓬巷無與適陟此瓊臺岡賓友
既追隨兒童亦攜將攀躋得冢頂徙倚聊彷徨俯視千
里空仰看萬鶴翔遠迷亂峰翠近失平林蒼偃薄瑩神
骨咀嚙清肝腸朗詠招隱作悲吟黃竹章古人不可見
來者誰能量且復記茲日他年亦難忘

次圭父游將軍巖韻二首

極目危岑杳靄間，誰將層棟壓巖岬。
瘦筇上上莫辭遠，絕境行行得細觀。
督井尚餘茅經處，考槃無復碩人寬。
倦來拂石支拳睡，萬壑吟風午夢闌。

陳迹真成俯仰間，回頭猶認碧巖岬。
更煩地主殷勤意，得盡雲山表裏觀。
景晏共愁歸路遠，年侵獨負酒盃寬。
明朝覓句酬珠玉，剩喜詩情却未闌。

圭父約為金斗之遊，次韻獻疑聊發一笑。

幾日春風未破寒，遠峰晴露玉巒岏。不成蠟屐携筇去，且復鉤窓拄頰觀。聞道追遊當作意，故應期日尚能寬。陰崖凍合無垂練，却恐詩翁興易闌。

次彥集經營別墅之作

回北成南指顧間，要令華敞對巔岏。家山信有千巖擁

家山堂見
武夷諸峯

雲月何妨兩處觀，傑閣已資鄰築勝。

熹近蒙
知府掇

賜舊第
樓居

新基還見繚牆寬，老仙鶴骨殊蕭爽。歸興從今

豈易闌。

彥集圭父擇之同飲白雲精舍以醉酒飽德為
韻熹分得飽字醉中走筆奉呈

奔趨名利場禍福急相絞夜窓一反側膚垢紛兩爪豈
知親朋集晚食聊一飽心期共悠悠文字各稍稍華燭
既屢更詩腸亦頻攪寒更儘渠深深孤諷寧至郊

次劉圭甫和人梅花韻

意行欲遍江村路恰到詩人斷魂處梅花未肯笑春風
蔓草何須怨零露歸來四壁無餘聲俯檻祇有寒塘青

美人邂逅一笑粲倒影的皜疎枝橫寸心久矣遺紛雜
不但老禪齋夏臘此時恨恨欲何言本根落落幾難合
走遍諸君詩卷中西湖東閣病還同劃然長嘯驚夢破

碧雲散盡山叢叢

平父有攀條嚼葉繞十回日暮碧雲驚四合之句故云

奉酬圭父末利之作

玉蘂琅玕樹天香知見薰露寒清透骨風定遠含芬
致銷繁暑高情謝曉雲遙憐河朔飲那得醉時聞

奉酬圭父白蓮之作

忽傳夔府句并送遠公蓮翠蓋臨風迴冰華浥露鮮舞
衣清縞袂倒景爛珠躔想象芙蓉闕冥冥絕世緣

次圭父觀魚韻

平生三伏斷追遊誰喚來穿澗樹幽初訝網橫天影破
忽驚人蹴浪花浮鳴榔不用齊吳榜鼓柁何須學楚謳
便有金盤堆白雪却憐清泚向東流

奉同黃子厚賦白芙蓉呈劉彥集平父

湛湛曲池水曉含風露清田田綠蘿蓋粲粲白玉英澹

然絕世姿不與穠艷并俯鑒冰雪影詎懷兒女情山中
徒淹留堂下空目成獨有忘機客相看兩無營

觀洪遵雙陸譜有感呈劉平甫范仲宣二兄

近從新譜識臬廬擬喚安陽舊博徒只恐分陰閒過了

更教人誚牧猪奴

陶桓公嘗語人曰大禹聖者乃惜寸陰至於衆人當惜分陰豈可逸遊荒

醉生無益於時死無聞於後是自棄也諸參佐或以談戲廢事者乃命取其酒器蒲博之具悉投之江吏將則加鞭朴曰擣蒲者收猪奴戲耳君子當正其衣冠攝其威儀何有蓬頭跣足自謂宏達耶

次劉彥集木犀韻三首

衆芳搖落九秋期
橫出天香第一枝
莫似寒梅太孤絕
更交遙夜笛中吹

仙衣纔試爵金黃
便覺秋風滿院芳
定觀極知先透徹
通心豈是故迎將

秋到寒巖桂樹叢
小山吟罷思悲翁
不妨更作淹留計
占取人間十里風

寄謝劉彥集菖蒲之貺二首

君家蘭杜久萋萋
近養菖蒲綠未齊
乞與幽人伴岑寂

小窓風露日低迷

泉清石瘦碧纖長
秋露懸珠炯夜光
箇裏無窮間造化
別來誰與共平章

公濟惠山蔬四種并以佳篇來贖因次其韻

焯

靈草生何許
風泉古澗傍
寒裳勤采擷
枝節噀芳香
冷入玄根悶
春歸翠穎長
遙知拈起處
全體露真常

芹

晚食寧論肉知君薄世榮瓊田何日種玉本一時生白

鶴今休誤青泥舊得名收單還灸背北闕儻闕情

時公濟試

禮部

筍

新筍因君寄康廬入夢中丹元餘故宅翠竹尚餘風日

日來威鳳年年饌籜龍猶嫌有兼味不似一源功

廬山簡寂

觀道士陸修靜之所居從遠法師蓮社之遊賜號丹元先生觀有甜苦笋今者所惠乃甜笋也

蕨

西山採蕨人蓬首尚傾國懷哉遠莫致引脰氣已塞傾
筐忽墮前此意豈易得良遇不可遲枯筇有餘力

題吳公濟風泉亭

澗谷居永久高情未云酬茲焉發天祕始造寒巖幽上
有茂樹陰下有清泉流結亭倚蒼峭鑿磴窮嵌丘翠壁
自屏立青蘚亦環周竭來憇永夏凜若臨清秋仰空韻
笙芋俯檻鏘琳瑯幽聽一以會悠然與神謀遐哉超世
心暇日聊娛憂笑問車馬客誰能淹此留

再題吳公濟風泉亭

華林翠澗響風泉
竟日間來石上眠
更結危亭俯幽聽
未妨長作地行仙

奉和公濟兄留周賓之句

丙申九日

端居感時序
駕言誰適從
聊携二三子
杖屨此日同
悠哉素心人
宴坐空巖中
真成三秋別
夢想情何窮
行行陟崇岡
引脰希高風
忽然兩相值
俯仰迷西東
鱸堂偶休閑
雞黍聊從容
不辭腰脚勞
共上西南峰
佩萸笑長

房把菊追陶公遐觀衆山迴一酌千慮融興罷復來歸
杳靄秋堂空窺樽訖餘瀝倚閣聞疎鐘主人意未闌驪
駒勿忽忽

寄吳公濟兼簡李伯諫五首

客子歸來春未深祇應寒雨罷登臨聞窓竟日焚香坐
一段孤明見此心

三徑莓苔晝掩闌君來問道却空還從今蠟屐應無恙
有興何妨再入山

盤翁別去久無書可復因循自作疎珍重寄聲煩問訊
箇中消息定何如

繁絃急管盛流傳清廟遺音久絕絃欲識寥寥千古意
莫將新語勘塵編

謂鹽官
中庸

憶昔殊方久滯淫年深歸路始駸駸傍人欲問草瓢藥
理義誰知悅我心

公濟和詩見閤耽書勉以教外之樂以詩請問

二首

至理無言絕淺深塵塵刹刹不相侵如云教外傳真的却是瞿曇有兩心

未必瞿曇有兩心莫將此意攪儒林欲知陋巷憂時樂只向韋編絕處尋

伯諫和詩云邪色蛙聲方漫漫是中正氣愈駸駸予謂此乃聖人從心之妙三歎成詩重以問彼二首

任從耳畔妍聲過特地胸中順氣萌箇裏詎容思勉得

羨君一躍了平生

闕里當年語從心至今縱跡尚難尋
况君真到無心處肯向人前話淺深

游百丈山以徙倚弄雲泉分韻賦詩得雲字

執熱倦煩跼駕言起宵分隨川踏曉月
度嶺披朝雲攀緣白石梯拂拭蒼蘚紋
噴薄驚快覲琮瑋喜先聞奇哉此精廬
眇然隔塵氛諸公肯同來定非俗子羣
永日坐清樾短章策奇勲慨然念疇昔
聯裾已荒墳中路忘磬

折寸心謾絲棼惟應泉石願三生有餘薰茲游獲重尋
十載心氤氳他年訪舊躅山靈莫移文

百丈山六詠

石磴

層岷俯深幽微逕忽中斷努力一躋攀前行有奇觀

小澗

兩崖交翠陰一水自清瀉俯仰契幽情神襟頓飄洒

山門

置屋兩三間，巧當奇絕處。峽東百泉傾，澗激回風度。

石臺

出谷轉石稜，俯身窺木末。夕眺嵐翠分，朝躋雲海澗。

西閣

借此雲窓眠，靜夜心獨苦。安得枕下泉，去作人間雨。

瀑布

巔崖出飛泉，百尺散風雨。空質麗晴暉，龍鸞共掀舞。

游蘆峰分韻得盡字

蘆山一何高，上上不可盡。我行獨忘疲，泉石有招引。須
臾出蒙密，矯首眺無畛。已謂極崢嶸，仰視猶隱嶙。新齋
小休憩，餘力更勉。毚東峰切霄，漢首夏正淒。緊杖策同
攀，躋極目散幽窘。萬里俯連環，十重瞰孤隼。因知平生
懷，未與塵慮泯。歸塗采薇蕨，晚餉雜蔬筍。笑謂同來人，
此願天所允。獨往會淹留，寒棲甘菌蠢。山阿子慕予，無
憂勤回軫。

同丘子服游蘆峰以嶺上多白雲分韻賦詩得

白字

登巖出囂塵入谷媚泉石悠然愜幽趣不覺幾朝夕高
尋倦冢頂舊賞歎陳迹仰慙仙人杖俯愧謝公屐昨日
吾弟來勇往意無數今晨蓐食罷千仞一咫尺心期未
究竟眼界已開闢浮野衆麓青縈雲兩川白須臾互吞
吐變化已今昔曠若塵慮空悲哉人境窄平生有孤志
萬里思矯翮感此復冲然胡為尚形役

登蘆峰

行到蘆峰最上頭，幾回振策又還休。
因君好句撩孤興，却恨雲烟未肯收。

將遊雲谷約同行者

躋險擇幽棲，牽羅結茅屋。疏泉下石澗，種樹滿烟谷。
時登北原望，一騁千里目。雲物下逶迤，岡巒遠重複。
暫辭

忽曠歲再往，恨牽俗因悲。昨遊侶或已在，鬼錄前年元
履同游

暄風悟新陽，一雨欣衆綠。明發君莫遲，幽期我當卜。

九月六日早發潭溪夜登雲谷翌旦賦此

懷山不能寐中宵命行軒亭午息畏景薄暮登危巒峻
極踰百磴縈紆欲千盤行行遂曛黑月落天風寒羽人
候中塗良朋集林端問我何所迫而嘗茲險艱疲勞既
云極飢渴不能言投裝臥中丘幸此一室寬怒號竟永
夕客枕無時安旦起關幽戶竹樹青檀欒驚喜非昔覩
披尋得新觀淹留十日期俯仰有餘歡寄語後來子勿
辭行路難

雲谷二十六詠

雲谷

寒雲無四時散漫此山谷
幸乏霖雨姿何妨媚幽獨

南澗

危石下崢嶸高林上蒼翠
中有橫飛泉崩奔雜奇麗

瀑布

峰回危逕轉垂練忽十尋
不為登山倦躊躇秋澗陰

雲關

白雲去復還黃塵到難入
只有澗水聲出關流更急

蓮沼

亭亭玉芙蓉迴立映澄碧只愁山月明照作寒露滴

杉逕

南起雲關口縈紆上草堂天風發清籟山月度寒光

雲莊

小丘橫翠几層嶂復嵯峨釋耒閑來看巖竇此處多

泉硤

入關但平田復此得清響何必問真源神襟一蕭爽

石池

兩岸蒼峭石護此碧泓寒秋月來窺影驪珠吐玉盤

山楹

山楹一悵望恨此雲迷谷仙人不可期縹緲雙髻綠

藥圃

長鑿劖靈根時此泉下圃珍劑未須論丹萸已堪煮

井泉

山高澤氣通石竇飛靈液默料谷中雲多應從此出

西寮

畚田種胡麻結草寄林樾珍重無心人寒棲弄明月

晦菴

憶昔屏山翁示我一言教自信久未能巖棲冀微效

草廬

青山遶蓬廬白雲障幽戶卒歲聊自娛時人莫留顧

懷仙

西望多奇峯北瞰獨仙府欲致武夷君石壇羅桂醕

揮手

山臺一揮手從此斷將迎
不見塵中事惟聞打麥聲

雲社

自作山中人即與雲為友
一嘯雨紛紛無勞三奠酒

桃蹊

澗裏春泉響種桃泉上頭
爛紅紛委地未肯出山流

竹塢

悄倩桃蹊北蕭摻竹塢
深不堪秋夜永風雨助悲吟

漆園

舊聞南華仙作吏漆園裏應悟見割憂嗒然空隱几

茶坂

攜巖北嶺西采擷供茗飲一啜夜窓寒跣趺謝衾枕

絕頂

當年赫曦臺移治在茲嶺寥廓無四鄰三光疑倒影

北澗

土斷川亦分北下成陰澗秀石得佳名服膺吾敢慢

有澗

仁義
石

中溪

南下東嶺阿云是中溪道巖樹愛椽枝石田悲蔓草

休菴

別嶺有精廬林壑亦幽絕無事一往來茶瓜不復設

雲谷雜詩十二首

登山

夕陽翳東峰微月下西嶺不辭青鞋穿陟此巖路永巖

路永且躋中情何耿耿

值風

山下風吹衣山上風拔木茅茨何足保瀛海慮翻覆未
念執鬯人無心還自恣

見易傳
震卦

觀月

風起雲氣昏風定天宇肅遙遙萬里暉炯炯穿我屋良
友共徘徊山中詎幽獨

謝客

野人載酒來農談日西夕此意良已勤感歎情何極歸
去莫頻來林深山路黑

勞農

四體久不勤筋力坐驚緩何事兩山阿離離豆苗滿多
謝植杖翁居然見長短

講道

高居遠塵雜崇論探杳冥疊疊玄運駛林林羣動爭天
道固如此吾生安得寧

懷人

吾黨二三子欲來從我遊塵機諒擾擾遐諾終悠悠空

山日復晚佇立悵夷猶

子厚伯崇有約不至

倦遊

故人千里別約我仍丹丘云何一解散書到令人愁此

山豈不幽何必賦遠遊

時得伯恭書報罷天台之遊

修書

細書厭塵累執簡投雲關靈鑰啓玄秘肅斧鋤幽姦書

成莫示人留置此山間

卷六

宴坐

登山思無窮臨水心未厭沈疴何當平膏肓今自砭默
坐秋堂空遐觀靡餘念

下山

行隨流水聲步出哀壑底綠樹枝相樛白澗石齒齒樹
石無窮年流水日十里

還家

出去柴門掩歸來蕙草秋素萼林下吐清芬衣上浮欲
寄山中友日暮悵離憂

雲谷合記事目要俳體戲作三詩寄李通

雲闕須早築基址要堅牢栽竹行教密穿池岸欲高乘

春移菡萏帶雪覓蕭摻

謂杉
徑也

更向關門外疏泉斬亂蒿

堂成今六載上雨復旁風逐急添茆蓋連忙畢土功

謂
柱

下貼 桂林何日秀蘭徑幾時通并築雙臺子東山接水

筒

莊舍宜先立山楹却漸營泉疏藥圃潤堰起石池清早
印荒田契仍標別戶名想應頻檢校祇恐欠方兄

雲谷懷魏元履

歎息良齋老當年共此來十峰奇絕處一望興悠哉病
怯披雲卧詩勞擁鼻裁祇今何處所宿草閱餘哀

送許順之南歸二首

門前三徑長蒿萊愧子殷勤千里來校罷遺書却歸去
此心元自不曾灰

幾年江海事幽尋，徧與雲僧話此心。
今日肯來論舊學，歲寒猶恐雪霜侵。

宿雲際寺許順之將別以詩求教次韻

薄暮投花縣，聯車入翠微。
長林生缺月，永夜照寒扉。
情話欣無斲，離懷悵有違。
勉哉彊毅力，千里要同歸。

挽汪端明三首

聖主興炎運，明公起妙年。
材推漢庭右，學自北方傳。
出入丹心壯，安危素髮鮮。
空餘題劍在，光燭舊林泉。

曠宇元無際孤標自不羣物情良有寄讒口詎堪聞未
許時明政猶堪史闕文衣冠忽長夜餘子謾紛紛

先友當年盛斯文元祐徒艱虞共流落存沒半嗚呼顧
我真無賴逢公幸不孤抵今還一慟即此是窮塗

彥集奉檄歸省示及佳篇次韻奉酬呈諸兄友
遊子思親久聚糧不堪官裏簿書忙平生况少鷹鷂志
此日尤慙時世粧臘雪未消歡奉檄春風初轉喜還鄉
上堂佳慶從容問一嚼何妨累十觴

彥集兄再適臨汀惠顧蓬華賦詩留別眷子良
勤次韻祖行言不盡意

賸喜君才老更成伊優叢裏見孤撐官身未免心徒壯
親膝頻違淚欲橫薄領不嫌春筍束廉聲要比玉壺清
枉車投翰殷勤甚安得仁言與贈行

圭父為彥集置酒白蓮沼上彥集有詩因次其
韻呈坐上諸友

大阮歸來客滿堂更移芳席近回塘共憐的礫水花淨

并倚離披風蓋涼銀筆看題青玉案佳人悵望白雲鄉
此情此景真愁絕病著無因為舉觴

寄題宜春使君定叟張兄隱齋

大專槃萬生異體實同氣云胡分彼已直以私自蔽
君家桂林伯德學妙一世閉戶不忘憂纓冠矧行義
眷言介弟賢四益謹先畀千里各分符一心同盡瘁
遠題齋戶冊來表棲息地系述寫心胸俯仰資惕厲
陽嘉既滌蕩陰慝失封閉介然彼苛瘡嚇若我黔劓

拊摩極哀恫征取敢常藝戰兢一日力洋溢四封被
君看物我間隱顯豈殊致願反振民功更懋根本計

次韻題平父兄重建一枝堂

畫戟朱門枕碧山貂蟬元自出儒冠更餘此日林間樂
遠繼當年膝下歡命駕賓朋千里近放懷琴酒百憂寬
遺編却好傳孫子莫遣因循學晏安

日用自警言示平父

圓融無際大無餘即此身心是太虛不向用時勤猛省

却於何處味真腴尋常應對尤須謹造次施為更莫踈
一日洞然無別體方知不枉費功夫

抄二南寄平父因題此詩

闕里言詩得賜商

子貢子夏

千秋誰復與相望鄒汾

孟子文
中子

斷簡光前載闕洛

張子程子

新書襲舊芳析句分章功自少

吟風弄月興何長從容詠歎無今古此樂從茲樂未央

題劉平甫定菴五詠

定菴

風生長林悲雲起空谷瞑下有不死人一室常在定

巢雲

入山何所見雲樹春濛濛安知巢居子避世於其中

山臺

林居厭棲迷山頂幸清曠無事一登臨却愁心浩蕩

井泉

開山昔何人鑿此寒泉井獨夜嗽瓊瑤冷然發深省

壽穴

百年不可期一壑當預卜自憐木偶人空羨王官谷

劉平甫席上分韻得寫字

歲暮風雨交流雲暗平野公子燕華姻招呼及同社

高情寄壺觴晤語到風雅剪燭夜堂深幽懷共輸寫此詩

恐當作
一首

劉平甫分惠水梳小詩為謝二首

年來衰懶罷書淫偶向盆山寄此心何事涼陰老居士

便分幽賞助清吟

何處飛來簷蔔林老枝摶屈更蕭摻淒涼杜老江頭句

坐對行吟得自歲

少陵江頭五詠於梔子詩云於身色有用與道氣傷和

和喜雨二絕

雨師誰遣送餘春珍重天公惠我民且看歡顏垂白叟
莫愁頰頰踏青人

黃昏一雨到天明夢裏豐年有頌聲起望平疇烟草綠
只今投筆事農畊

和章國華祈雨呈平父諸兄三首

金
六
極目平疇半欲枯
遙知精禱意無餘
更憐不待豚蹄祝
便得汙邪暗滿車

九重清夜仰昭回
旱魃知從何處來
不是幽人祈得雨
又煩丹詔走風雷

晴窓揮汗苦驕陽
雨檻披衣快晚涼
多謝龍公餘事業
為驅寒谷變炎方

山館諸兄共賦驟雨鷺鷥二絕

平疇焦渴不堪論
蕭鼓悲秋徹帝閣
霹靂一聲雲自墨

山前山後雨翻盆

雨罷微塘凜欲秋
飛來白鳥便夷猶
從今認得橫塘路
水遠山長百不憂

唐石雪中

春風欲動客辭家
霖潦縱橫路轉賒
行到溪山愁絕處
午林一夜玉開花

秋日同廖子晦劉淳叟方伯休劉彥集登天湖
下飲泉石軒以山水含清暉分韻賦詩得清字

閒居寡儔侶掩關抱孤清良友條來止曠然舒我情矧
此涼秋初暑退裳衣輕相與一攜手東山眇遐征前穿
林嶺幽俯瞰川原平降集崖寺古徘徊濁醪傾長吟伐
木篇潛鱗亦相驚願結沮溺耦窮年此巖畊

淳熙戊戌七月二十九日與子晦純叟伯休同
發屏山西登雲谷越夕乃至而李通德功亦自
山北來會賦詩記事以雲卧衣裳冷分韻賦詩
得冷字

端英得幽貞考槃寄茲嶺未成長往計抱恨中耿耿秋
風吹庭樹遙夜枕席冷感彼歲序移慨此心事永明晨
發孤興趣駕向絕境躋攀力雖倦想象意逾騁雲山一
以眺俯仰疑倒景檢校石田收眷戀茅屋靜淹留復未
遂外物愧張邴珍重同來人妙語各清整擊節三歎餘
超然得深省

宿黃沙以山如翠浪湧分韻賦詩得如字

日中秣吾馬日暮膏吾車崎嶇陟南嶺浩蕩凌八嶇夜

雨薦峰前朝登碧琳瑯蒼茫永獻罷翕忽清景徂去此
二三子我行將焉如崔嵬正丘垤萬里思南圖

雲谷次吳公濟韻

昔營此幽棲邈與世相絕誓將百年身來守固窮節心
期苦未遂歲月一何濶終然匹夫志肯遽甘沒沒茲晨
復登瞰目盡雲一抹激烈永獻餘朗寥高韻發夫君內
德備不學王駘兀觀心見參倚出世自英傑竭來肯顧
我同去弄雲月微言得深扣大句亦孤拔多謝警疎慵

未敢歎瞻忽更問毫釐間是同端是別

宿休庵用德功壁間韻贈陳道人

暮入千峰裏寒棲一草菴
室連丹竈煖厨引石泉
甘塵慮紛難到神光暖
內含非君有道氣孤絕詎能堪

挽劉樞密三首

天畀經綸業家傳忠義心
謀謨經國遠勳烈到人深
廊廟風雲斷江湖歲月侵
一朝成殄瘁九牧共沾襟

談笑平蠻策焦勞振廩功
復讐乖宿志忍死罄餘忠
人

嘆百身贖天悲一鑑空九原終莫起千載自英風
久矣身無用前恩嘆莫償豈期今老大復此重悲傷淚
向遺書盡心隨宿草荒諸君那不死慟絕鬢成霜

武夷七詠

天柱峯

屹然天一柱雄鎮幹維東抵說乾坤大誰知立極功

洞天

絕壁上千尋隱約巖栖處笙鶴去不還人間自今古

畫鶴

誰寫青田質，高超鴈鷺羣。
長疑風月夜，清唳九霄聞。

仰高堂

面勢來空翠，哦詩獨好仁。
懷人今已矣，誰遣棟梁新。
此堂

與迎綠亭皆劉建康所名，禮記引高山仰止，景行行止之詩，而曰詩之好仁如此。

趨真亭

危亭久已傾，砥有頽基在何事。
往來人不知，容鬢改。

大小藏巖

藏室岌相望塵編何莽鹵欲問伯陽翁風烟迷處所

丹竈

仙人推卦節煉火守金丹一上烟霄路千年亦不還

壬子三月二十七日聞迅雷有感

誰將神斧破頑陰地裂山開鬼失林我願君王法天造
早施雄斷答羣心

考異

和人遊西巖

澗寺

澗一作樹

題周氏溪園三首

一無後一首

次韻梧竹

檀欒

一作團欒

慘淡

一作慘澹

次開善避暑韻

花思滿胸存

一作花氣滿思存

送林熙之

妙縵

一作妙菴

只自

一作合自

若知體用元無

間

一作若明體用真無間

晚步偶成

雨罷寒逾勁

一作雨歇寒逾勁

暗晴川

一作陪澄鮮

和晝寒韻

爭流

一作
爭陳

樹石

一作
謝石

謁劉公墓

誤國

一作
達國

此公

一作
戎公

次彥集別墅

信有

一作
倍有

次和人梅花韻

本根

一作
本願

焯

芳香

一作
芬香

翠韻

一作
秀韻

片

牧單

一作
收功

筍

撐龍

一作
伏龍

寄吳公濟

客子

一作
投紱

祗應

一作
祗因

罷登

一作
倦登

從今

一作只今

寄聲

一作寄音

年深

一作年來

欲問

一作若問

游百丈山

隨川

一作隨風

石臺

出谷

一作山谷

同丘子服遊蘆峰

兩川

一作滿川

杉逕

南起

一作晨起

桃蹊

裏春

一作東春

絕頂

移治在茲嶺

一作移來名北嶺

休菴

林巖

一作林澗

值風

山上

一作山中

謝客

酒來

一作酒至

頻來

一作頻來

修書

雲關

一作靈關

定菴山臺

林居

一作林中

雲谷次吳公濟韻

觀心見參倚

一作秉心極清淨

世自

一作世有

更問

一作且問

晦庵集卷六

欽定四庫全書

集部
晦庵集卷八

詳校官庶吉士臣朱理

主事臣呂雲棟覆勘

總校官庶吉士臣倉聖脉

校對官中書臣葉莢

謄錄監生臣宋允辰

欽定四庫全書

晦菴集卷七

宋 朱子 撰

詩

崇壽客舍夜聞子規得三絕句寫呈平父兄煩
為轉寄彥集兄及兩縣間諸親友

空山初夜子規鳴靜對琴書百慮清
喚得形神兩超越不知底是斷腸聲

空山中夜子規啼病怯餘寒覓故衣
不為明時堪眷戀

久知岐路不如歸

空山後夜子規號斗轉星移月尚高
夢裏不知歸未得已驅黃犢度寒臯

寄雲谷瑞泉菴主

憶昔誅茅日山房我自名風埃猶俗累
烟雨負巖耕多謝空門侶能同物外情
肯來分半壑聊爾度平生少待清秋日
閒尋遠嶽盟不知誰是客一笑絕塵纓

入南康界閱圖經感陶公李勃劉凝之事戲作

長官定笑歸來晚中允應嫌去却回惟有山人莫相笑
也曾還俗做官來

屢游廬阜欲賦一篇而不能就六月中休董役
卧龍偶成此詩

登車閱嶺微息駕康山陽康山高不極連峰鬱蒼蒼金
輪西嵯峨五老東昂藏想象象仙聖集似聞笙鶴翔林谷
下淒迷雲闕杳相望千巖雖競秀二勝終莫量仰瞻銀
河翻俯看交龍驤長吟謫仙句和以玉局章疇昔勞夢

思茲今幸徜徉尚恨忝符竹未愜棲雲房已尋兩峰間
結屋依陽岡上有飛瀑駛下有清流長循名協心期弔
古增悲涼壯齒之竒節頽年矧昏荒誓將塵土蹤暫寄
雲水鄉封章儻從欲歸哉澡滄浪

讀李賓老玉澗詩偶成

獨抱瑤琴過玉溪琅然清夜月明時祇今已是無心久
却怕山前荷蕢知

立秋日同子澄寺簿及僉判教授二同寮星子

令尹約周君段君同遊三峽過山房登折桂分
韻賦詩得萬字輒成十韻呈諸同遊

抗塵幾何時猿鶴共悲怨豈知朱墨暇乃適山水願茲
晨秋令初休沐謹邦憲佳賓忽四來英僚亦三勸駕言
北郭門謝此旗隼建散目山崔嵬縱轡路修蔓凭欄快
倒峽躋壑困脫輓追攀林樾深歡喜脚力健登高眺遠
浦衆景爭自獻何必仍丹丘徑欲凌九萬

和子澄白鹿之句

經旬不到鹿場陰夢想飛馳不自禁幸有高軒同勝賞
何妨折屐共幽尋徘徊未厭詩書樂感慨難忘忠孝心
更對豐鎬哦伐木風泉雲壑助清吟

暇日侍法曹叔父陪諸名勝為落星之遊分韻
得往字率爾賦呈聊發一笑

長江西委輸匯澤東澗瀆中川屹孤嶼佛屋寄幽賞我
來此何日秋氣欲蕭爽共載得高儔良晨豈孤往酒酣
清歛發浪湧初月上疊鼓喚歸艍陳迹真俯仰

九日奉陪高州史君蒲陽別駕會稽丞公善化
明府仲衡詩伯并屈子美元範二兄及郡中諸
文武同登紫霄絕頂南望江湖北眺淮甸少快
心目既歸又得仲衡佳篇句法清麗情致悽惋
三復不勝起予之歎謹次韻呈請皆賦之以紀
一時之盛甚惠甚望

此日登高處十年錦樹稠無人嘲落帽有客賦悲秋忽
忽塵中老忽忽物外遊江湖空極目不盡古今愁

下元節假行視陂塘因與賓友挈兒甥出郭登
山歸賦二詩示子直春卿及折桂雲谷并寫呈

郡中諸寮友

廬阜東北際岵峩五峰尊中巖穹林繞青天白雲屯郡
閣有佳眺徙倚空朝昏今晨幸休暇發軔北郭門牽蘿
出林端躡屐躋雲根高尋却清宦小憩欣潺湲古殿宿
寒靄新蕙麗朝暾扶藜陟東岡夙昔規曾軒却倚千尋
峭前窺百泉奔長風卷浮埃江湖渺相吞結架雖未諧

雄瓌已難論同來俱勝流
晤語仍王孫已踐支許諾
不慙夙尚魂賦詩紀茲日
歲晚期相敦

卧龍之遊得秋字賦詩紀事呈同遊諸名勝聊
發一笑

躡石度急澗窮源得靈湫
谿谿兩對立噴薄中怒投
何年避人世結屋棲巖陬
嘉名信有託故迹誰能求
我來一經行淒其仰前修
鄰翁識此意伐木南山幽
為我立精舍開軒俯清流
多岐諒匪安一壑真良謀
解組云未

遂驅車且來遊嘉賓頗蟬聯野藪更獻酬飲罷不知晚
欲去還淹留躋攀已別峰窺臨忽滄洲下集西澗底沉
吟樹相膠王洲茗飲餘三峽空尊愁懷賢既伊鬱感事
增綢繆前旌向城郭回首千峰秋

卧龍之遊錢通守得江字不及賦詩已解維矣
煮用其韻紀事以贈并附卷末

君行安所適衝風沂濤江傳聞閩州好未見心已降邀
君康山遊聽此巨壑淙班坐酌溪石幽尋憩雲窓勸君

盡此杯錦帆已稠
杠明年儻來東鳴
鏡建高幢訪我深
澗底晤言絕紛囂
城南且細說慰我心
慳慳

分韻得眠意二字賦醉石簡寂各一篇呈同遊
諸兄

驅車何所適往至秋雲邊
企彼澗中石舉觴酌飛泉
懷哉千載人矯首辭世喧
淒涼義熙後日醉向此眠
仰視但青冥俯聽驚潺湲
起坐三太息涕泗如奔川
神馳北闕陰思屬東海
壖丹衷竟莫展素節空復
全低徊萬古

情惻愴顏公篇為君結茅屋歲暮當來還 醉石

天秋山氣深日落林景翠亦知後騎迫且復一流憇環
瞻峰列屏迴矚泉下淍永懷仙陸子久挹浮丘袂于今
知幾載故宇日荒廢空餘醮壇石香火誰復繼更憐韋
刺史五字有真意虎竹付歸人悲風起橫吹沉吟句絕
迹浩蕩發幽寄來者知為誰念我疇三喟簡寂

尋白鹿洞故址愛其幽邃議復興建感歎有作
清冷寒澗水窈窕青山阿昔賢有幽尚眷言此婆婆事

往今幾時高軒絕來過學館空廢址鳴絃息遺歌我來
勸相餘杖策蹇綠蘿謀野欣有獲披圖知匪訛永懷當
年盛華莘衿佩多博約感明恩涵濡熙泰和淒涼忽荒
榛俯仰驚頽波發教逮綱紀喟然心靡它伐木循陰岡
結屋依陽坡一朝謝塵濁歸哉碩人邁

時已疏上尚書乞洞主矣

遊白鹿洞喜得謝字賦呈元範伯起之才三兄

并示諸同遊者

歲月有環周窮臘忽受謝眷眷山水心幸此朱墨暇招

呼得良友邂逅成風駕深尋故轍迹喜見新結架永懷
拾遺公藏器此待價橫流詩書澤下及揚李霸炎神撫
興運制作流大化石室萬卷藏綸言九天下規模未云
遠荒蕪良可詫自非賢邑宰誰復此精舍會當求救賜
畢願老耕稼更與盡心期臨流抗風榭

元範尊兄示及十梅詩風格清新意寄深遠吟
玩累日欲和不能昨夕自白鹿玉澗歸偶得數

語

江梅

大雪天地閉窮陰
渺寒濱誰知江南信
已作明年春

嶺梅

梅花破萼時瘴雨
吹成雪驛使忽相逢
無言似愁絕

野梅

野風吹孤芳迥立
正愁絕皂蓋莫徘徊
堪看不堪折

早梅

霜風殊未高杖策
荒園裏仙子別經年
相看共驚喜

寒梅

白玉堂前樹風清月影殘無情三弄笛
遙夜不勝寒

小梅

且喜梅花開莫嗟梅花小花小風味
深此意君已了

疎梅

玉笛未黃昏冰灘已清淺疎影不勝妍
愁心為誰遠

枯梅

樛枝卧龍蛇冷蘂綴冰雪千里古人心
今年為誰折

家

居時劉平甫
折此枝為贈

落梅

花開已淒涼
花落更愁寂
來歲烟雨時
為君和鼎實

賦梅

君欲賦梅花
梅花若為賦
繞樹百千回
句在無言處

觀梅小集以齋禁不得奉陪因寄小詩

梅花年後欲離披
恰是先生變食時
送與西樓一尊酒
諸君莫負可憐枝

金夕八ノ二ノ一
卷七
元範別後寄惠佳篇清叟次韻見示格律俱高
詠歎不置因亦用韻寫呈二兄聊發一笑

故人別我去一月曠音驛今朝得新詩開卷意已適知
君到里門征騎聊一息行復敞天閣從容正朝幘自今
九霄路不復兩塵隔容與日華東翱翔禁扉北回頭五
峰下寂寞笑孤客不賦歸去來心形謾相役

右呈
元範

五十行過二雙鬢颯秋草平生素心人誰與共茲抱今
年廬山下得子恨不早歲月幸同庚詩書復同道惟應

山南北雲母夜堪擣獨生有仙期迴崖詎難到丹經不
我誑白髮不一掃看公鬚眉蒼杖鉞督征討

右呈
清史

次卜掌書落成白鹿佳句

重營舊館喜初成要共羣賢聽鹿鳴三爵何妨奠蘋藻
一編詎敢議明誠深源定自閑中得妙用元從樂處生
莫問無窮菴外事此心聊與此山盟

白鹿講會次卜丈韻

宮牆蕪沒幾經年祇有寒烟鏤澗泉結屋幸容追舊觀

題名未許續遺編

請為洞主不報

青雲白日聊同趣

謂西澗劉公

霽

月光風更別傳

謂濂溪夫子

珍重箇中無限樂諸郎莫苦羨

騰騫

再用前韻示諸同遊

幽卧寒巖不記年飽看山月聽風泉
舒憂正得琴三疊
玩意惟憑易一編
誤落塵中乖夙尚
却思洞裏付真傳
封章倘幸天從欲
便解銅符謝繫騫

次韻四十叔父白鹿之作

誅茅結屋想前賢千載遺蹤尚宛然故作軒窓挹蒼翠
要將絃誦答潺湲諸郎有志須精學老子無能但欲眠
多少箇中名教樂莫談空諦莫求仙

送四十叔父

吾家從昔號清門叔父于今道更尊客路艱難空自惜
遺經終始向誰論獨尋雲嶠逢孤姪共愛春江接故園
細說刈葵休放手此來真不為盤餐

伏蒙秘閣張丈寵顧下邑并以長篇為貺降歎

之餘牽勉繼韻仰求斤削僭率皇恐

向來滅迹東山東閉門不問烏雌雄門前有路向塵土
兩足未舉心先慵當時亦有車馬客此意欲說嗟誰同
窮居聊復追仲蔚篤論何必須劉龔平生故人子張子
相思安得長相從每勞書疏問生死坐想星宿羅心胸
幾年持節漢水上木牛流馬旌旗紅君王輟饋思頗牧
外庸且訖來朝宗因能過我紫霄下後乘載得朱簾櫳
蒼顏白髮應笑我曷不飽卧陶窓風開樽鵝池水清激

下馬醮石烟空濛須臾路轉山更好摩天巨刃排雙峰
少看銀河忽倒掛直欲跳下清泠中南臨匯澤共指點
縹緲貝闕浮珠宮公言平日愛登覽到此一洗羣山空
坐間為我出奇句不用遠寄南飛鴻上言雲泉足奇賞
下歎契闊歡相逢紛吾失脚墮世網乃有此會寧天窮
流光過眼驚昨夢舊約回首羞塵容明朝却上烟艇去
滅沒萬頃追鳧翁

和張彥輔初到南康之句

十年不共賦陽春正有胸中萬斛塵失喜清詩還入手
細看佳句轉驚人知公近覺青山好顧我頻嗟白髮新
肯過寒齋共尊酒向來心事請深陳

奉同都運直閣張文哭敬夫張兄張丈有詩敢
次元韻悲悼之極情見乎詞伏幸采覽二首

秀翁威畧憺華戎遺恨車書久未同喜有象賢堪嗣事
故知鴻業自無窮蕃宣合奏三年最風采俄驚一旦空
根本平生有深計遺書不但子囊忠

不應世道即漂淪何事今年失此人禮樂端能懷益友
琴笙忍遽樂嘉賓亦知遊好曾通譜却記登臨喚卜鄰
兩首悲詩數行淚感傷那復闕清新

張文垂顧適聞訃音為罷郡宴敬夫

向常約熹徙居湖之上蓋相語於裴公臺上云

秘閣張文簡寂之篇韻高難繼別賦五字以謝

來貺

勞農會稽宅息駕丹元鄉丹元不可見翠碧空雲房是
時中春月暄風發新陽白水注幽壑綠樹敷崇岡俯聽

足怡悅仰觀共徜徉班坐得瑤草傾壺出瓊漿長吟遊
仙詩亂以招隱章忽忽林景西躊躇申慨慷坐上江海
客兀傲鬚眉蒼逸氣邁霄漢英詞吐琳琅思與泉石勝
韻隨笙鶴翔追遊不敢及咏嘆可能忘

俗傳歸宗是王右軍故宅陸修

靜封丹元真人

和張彥輔落星寺之作

嵌空竒石戰驚濤樓殿崢嶸勢自高四面真成開玉鑑
三山應是失金鰲題詩正爾難搜句舉酒何妨共作豪

倚遍闌干更愁絕歸來白盡鬢邊毛

和張彥輔白鹿洞之作

邃谷新華館風烟再吐吞舊眠聞野鹿遺恨響驚猿

李拾

遺自此徙居少室乃被徵故有此句共賞忻同趣分攜愴別魂徘徊空日夕無策駐行軒

次張彥輔西原之作

無處堪投跡空山寄一椽懸門窺絕壁繚徑上層巔檻
闊吞江浪窻虛響谷泉丹經閒自讀不為學神仙

次張彥輔卧龍之作

瀑水源何處高疑雲漢通瀉時垂練直落處古潭空
寄詩能好龍蟠意自雄知君來峴首為我說隆中

次張彥輔棲賢之作

融冶何年事停杯莫問天祇今從痼疾疇昔似因緣
傾耳真三峽投文總九淵蘭亭那得此猶足致羣賢

和張彥輔雪後棲賢之作

夜來春雪遍林丘却喜風威曉便收好上籃輿間縱目

莫將衲被苦蒙頭，微官正愧逍遙社。
勝日猶堪汗漫遊，欲出林關戀瑤草。
不妨尊酒更淹留。

謝張彥輔留別之作

一別屢更歲，思君無已時。
知君亦念我，相望平兩嗟咨。
我病卧田間，君行護疆陲。
隱顯既殊跡，會合安可期。
今年定何年，有此一段奇。
我來五峰陽，君歸九江湄。
聞君肯來辱，歡喜不自持。
迎君紫霄峰，舉觴白鵝池。
強健初共欣，艱棘旋相悲。
相顧出危涕，薄言首東岐。
留連十日

飲愴恨八哀詩散懷水石幽遂忘筋力疲雄篇既鼎來
逸韻方窮追云胡遽告別牙燾風披披攬袂不得留酌
酒前致辭願君疇此觴去上白玉墀國論罄忠益廟謨
參設施一請正紀綱再請誅羗夷及時樹勲業慰我空

山飢

時聞張荆州計張文有
詩哭之故有八哀之句

奉答張彥輔戲贈之句

已驅送客車復著登山屐未論窺臨快且脫詩酒厄從
今謹出入保此頤正吉不奈歲寒心於公有深憶

王輔
嗣注

頤卦大象云禍從
口出病從口入

奉答張彥輔解嘲

康俗遺居萬疊山高垂鐵鑠詎容攀青鞋布鞢非公事
古木寒泉要我閑

伏蒙某官寵示和陶見寄舊作伏讀歎仰又感
知待期許之意蓋非一日率易次韻少見謝臆
伏惟矜憐有以教之

吾心抱經濟軒冕非所欣向來清禁闥本是山林人浩

歌歸去來神父邈何因一朝脫冠去妙境聊同臻謂予
雖後來臭味亦有聞賡詞久見屬重以告語勤荒寒想
高風令人思無鄰甘棠矧在此躑躅晴湖濱

贈于盛二生

昔日豐城劍寒光射斗牛江山餘秀傑人物尚風流二
妙今安匹孤帆各倦游還家問師友折節慕前修

秋日告病齋居奉懷黃子厚劉平父及山間諸
兄友

出山今幾時忽忽歲再秋江湖豈不永我興終悠悠
復逢旱魃農畝無餘收赤子亦何辜黃屋勞深憂而我
忝朝寄政荒積憊尤懷痾卧空閣惻愴增綢繆東南望
故山上有玄烟浮平生采芝侶寂寞今焉儔朝游雲峰
巔夕宿寒巖幽為我泛瑤瑟冷然發清謳裂牋寄晨風
問我君何求洪澤振君柁狹破摧君輶君還若不早無
乃非良謀再拜謝故人低徊更包羞桂華幸未歇去矣
從君遊

夜坐有感

秋堂天氣清坐久寒露滴幽獨不自憐
茲心竟誰識讀書久已懶理郡更無術
獨有憂世心寒燈共蕭瑟

讀諸友遊山詩卷不容盡和首尾兩篇

去年尋得李家山考卜真成屋數間
要與青衿時散帙閑臨碧澗共觀瀾
詩書本說人間事勲業休看鏡裏顏
誰識寥寥千古意新詩題罷薜痕斑

向來結友尋名山下窮絕壑高危頓胡為
一旦墮塵網

五老在望心茫然青牛底處有行迹白鹿幾時同正員
清遊帶雨想幽絕妙處只恐詩中傳

戲贈勝私老友

槐花黃盡不關渠老向功名意自疎乞得山田三百畝

青燈徹夜課農書

勝私先侍講嘗
著農書三卷

代勝私下一轉語

碓下泉鳴溜決渠屋頭桑樹綠扶疎朱虛正自知田事
馬服何妨讀父書

和戴主簿韻

平生本自好樓居况接高人永晝餘共喜江山入尊俎
從教幕府省文書感君肯出新詩句恨我終思舊草廬
擬借韋編訂龍馬免推納甲話蟾蜍

戴嘗有麻衣易說
自以為得之異人

云

次沈侍郎遊楞伽李氏山房韻

喜陪後騎陟崔嵬竹裏泉鳴古寺開吟罷蘇仙頭白句
天風更送好詩來

天聰已許一言悟年少懸知萬卷開珍重當時讀書處
低回空有後人來

奉同尤延之提舉廬山雜詠十四篇

白鹿洞書院

在郡城東北十五里事見記文

昔人讀書地町疇白鹿場世道有升降茲焉更表章矧
今中興年治具一以張絃歌獨不嗣山水無輝光荒榛
適剪除聖謨以汪洋亦有皇華使肯來登此堂問俗良
懇惻懷賢增慨慷雅歌有餘韻絕學何能忘

折桂院黃雲觀在書院東北五里院後作亭取李白黃雲萬里動風色之句名之

城中東北望五老何蒼蒼下有前朝寺一原頗深藏門

前林澗幽屋後雲木荒閑窓亦明潔著此瑞錦長僧房有瑞

花香更能理枯筇步上林北岡仰視天宇濶俯瞰江流長

即黃雲觀受書彼何人姓氏不足詳竹帛有遺臭桂樹徒芬

芳李逢吉嘗讀書此院去而登第以故得名

楞伽院李氏山房

在折桂西十里李公擇讀書處有東坡記文詩刻枯樹墨

跋

躡石循急磝穿林度重岡
俛入幽谷邃仰見竒峰蒼
李公英妙少年讀書此雲房
一去上臺閣致身何慨慷
蘇公記藏書文字有耿光
餘事亦騷雅戲墨仍風霜
兩公不歸來歲月忽已荒
何用建遺烈寒泉薦孤芳

棲賢院三峽橋

在楞伽西五里

兩岸蒼壁對直下成斗絕
一水從中來湧滴知幾折
石梁據其會迎望遠明滅
倏至走長蛟捷來翻素雪
聲雄

萬霹靂勢倒千崿嶮足掉不自持魂驚詎堪說老仙有
妙句千古擅奇崛尚想化鶴來乘流弄明月

西澗清淨退菴

在樓賢西三里劉凝之舊隱
作亭取黃太史詩語名之

凌兢度三峽窈窕復一原絕壁擁蒼翠奔流逝瀉浚聞
昔避世人寄此茅三間壯節未云遠高風杳難攀深尋
得遺墟縛屋臨清灣坐晚寒木杪飛泉闕雲關茲遊非
昔遊累解身復閑保此清淨退當歌不能諼

解印後與
友生遊集

徘徊
久之

卧龍菴武侯祠

在西澗
西三里

空山龍卧處蒼峭神所鑿下有寒潭幽上有明河落我
來愛佳名小築寄幽壑永念千載人丹心豈今昨英姿
儼繪事凜若九原作寒藻薦芳馨飛泉奉明酌公來識
此意顧步慘不樂抱膝一長吟神交付冥漠

萬杉寺

在卧龍
西十里

休沐聊命駕駕言何所之行尋慶雲寺想像昭陵時門
前杉徑深屋後杉色奇空山歲年晚鬱鬱凌寒姿當年

雨露恩千載有餘滋
匠石不敢睨孤標
儼相持

寺前後杉萬木

皆天聖中植有旨禁剪伐者

更啟石室藏
仰瞻天像垂
願以清淨化

永為太平基

寺藏仁祖御飛白書有清淨字

開先漱玉亭

在萬杉西二里亭舊在橋上今廢

奇哉康山陽
雙劍屹對起
上有橫飛雲
下有瀑布水
崩騰復璀璨
佳麗更雄偉
勢從三梁外
影落明湖裏
平生兩仙句
詠歎深仰止
三年落星灣
悵望眼空昧
今朝隨杖屨
得此弄清泚
更誦玉虹篇
塵襟諒昭洗

簡寂觀

在開先西五里
陸修靜所居

高士昔遺世築室蒼崖陰朝真石壇峻煉藥古井深結

交五柳翁屢賞無絃琴相攜白蓮渚一笑傾夙心晚歲

更市朝故山鎖雲岑柴車竟不返鸞鶴空遺音

修靜晚
為宋明

帝召至建康
卒於崇虛館我來千載餘舊事不可尋四顧但絕壁苦

竹寒蕭慘

相傳竹自修靜手植
其萌即所謂甜苦筍

歸宗寺

在簡寂
西十里

金輪紫霄上寶界鸞溪邊往昔王內史願香有餘烟

相傳

寺是王右軍故宅
千年今一歸景物還依然澗水既蕩滴山花

亦清妍不辭原隰勞樂此賓從賢訪古共紆鬱勞農獨
勤拳憐我乖勝踐裂牋寄真詮逃禪公勿遽且畢區中

緣

是日熹以事
不得陪杖屨

陶公醉石歸去來館

在歸宗
西五里

予生千載後尚友千載前每尋高士傳獨歎淵明賢及
此逢醉石謂言公所眠况復巖壑古縹緲藏風烟仰看
喬木陰俯聽橫飛泉景物自清絕優游可忘年結廬倚

蒼峭舉觴酌潺湲臨風一長歎亂以歸來篇

温湯

在醉石南二里

連山西南來中斷還崛起干霄幾千仞據地三百里飛
峰上靈秀衆壑下清美逮此勢力窮猶能出奇偉誰燃
丹黃燄爨此玉池水客來爭解帶萬劫付一洗當年謝
康樂絃絕今已矣水碧復留温相思五湖裏

康樂湖中詩云水碧

輟流温豈未見此水也耶

康王谷水簾

谷口景德觀在温湯西十五里入谷又十五里至簾下

循山西北驚崎嶇幾經丘前行荒蹊斷豁見清溪流一
涉臺殿古再涉川原幽縈紆復屢渡乃得寒巖陬飛泉
天上来一落散不收披崖日璀璨噴壑風颼颼追薪爨
絕品淪茗澆窮愁敬酌古陸子何年復來游

陸鴻漸茶經第此水

為天下
第一

落星寺

在郡城南湖中

浩浩長江水東逝無停波及此一回薄湖平烟浪多孤
嶼屹中川層臺起周阿晨望愛明滅夕遊驚蕩磨極目

青冥茫回瞻碧嵯峨不復車馬迹唯聞榜人歌我願辭
世紛茲馬老漁簑會有滄浪子鳴絃夜相過

閏月十一日月中坐彭蠡門喚船與諸人共載

汎湖至隄首回棹入西灣還分韻賦詩約來晚

復集詩不至者浮以太白

簽判渺教授空知縣
望吳學錄柱掌儀明

大彭兄蘭判官擊南公一小彭兄邈彥忠人直
卿余公度漿敬直懷衛父流晦翁光泰兒美棹

方

解組無多日歸哉喜欲狂臨風成邂逅載月下滄浪酌

酒傳清影鳴橈擊素光
它年隔千里此夜莫相忘

和林擇之黃雲之句兼簡同遊諸兄

登覽日云晏歸車眇同岡
天風振余旗夕露沾我裳
數子情未厭春山杳茫茫
還瞻長江白迴眺飛雲黃
當念塵中友心期邈相望
無為跨鴻鵠決起凌青蒼

和彭蠡月夜汎舟落星湖

長占烟波弄明月此心久矣從誰說
只今一舸漾中流
上下天光兩奇絕
回頭忽見西郭門
尚喜蘇仙有遺烈

問予何事却回船塵土浣君頭上雪

首句前用蘇養直詩蘇葛居水西門

外舟行望見其處

熹罷官觀康王谷水簾夜飲山月軒分韻得主

字奉別送行諸君

嗟余老不才記憶謝明主界茲山水郡北邇通玄府一
官再溫涼十日九塵土迨此解章紱絕境方快覩殷勤
故人厚追送崖寺古把酒聽鳴泉相看淚如雨

游天池

三年落星渚北望天池山臨風幾浩歎欲往無飛翰今
朝復何朝陟此青雲端高尋已竒絕俯瞰何其寬西窮
濂溪原東盡湓城關渺然滄波外淮山碧連環我意殊
未極更思出塵寰何當駕輕鴻八表須臾問視此長江
水滔滔儻西還

觀野燈

飛螢腐草尋常事作底茲山獨耀芒須信地靈資物化
金膏隨處發明光

山北紀行十二章章八句

祇役廬山陽矯首廬山陰雲峰不可覲碧澗何由尋昨

朝解印章結友同窺臨盡彼巖壑勝滿茲仁知心子以

二十七日罷郡是夕出城宿羅漢二十八日宿白鹿二

十九日登黃雲觀度三峡窺玉淵憇西澗飲西原宿卧

龍四月一日過開先宿歸宗二日浴湯泉宿康王谷觀

水簾宿景德觀三日與清江劉倩之子澄永嘉張揚卿

清叟潯陽王阮南卿周順龜父長樂林用中擇之洛陽

趙希漢南紀會稽陳祖永慶長武當祁真卿師忠溫陵

吳兼善仲達廬陵許子春景陽新安胡莘尹仲建安王

朝春卿長樂余偶占之陳士直彦忠黃榦季直臨淮張

彦先致遠會稽僧窺臨事若何請從圓通說逶迤山門

志南明老俱行

路悄悄修篁列溪仍侯家名屋是孱王設何救黍離歌

喟焉傷覆轍

圓通寺地名侯溪本侯氏所居李後主取以為寺無它奇但門徑竹木深茂可觀耳

行逢石門雨解驟寒澗東朝躋錦繡谷俯仰春冥濛懸

泉忽淙琤雜樹紛青紅屢憇小亭古幽探思無窮

石門澗正

在天池山下有小巷三四是夕宿所謂廣福巷者來日登山道錦繡谷再過小橋橋皆有亭下又有亭基二小

一亭竦身長林端策足層崖表仰瞻空界濶俯歎塵寰小

天池西欽峯佛手東窈窕杖屨徃復來憑軒瞰歸鳥盡

繡谷登山稍高無復林木坡陀而上至天池院在小峰絕頂乃有石池泉水不竭東過佛手巖石室嵌空中有

井泉僧緣崖結架以居下臨錦
繡谷又有石榻名遠公講經臺
斯須暮雲合白日無餘

暉金波從地湧寶燄穿林飛僧言自雄誇俗駭無因依

安知本地靈發見隨天機
天池院西數步有小佛閣下
臨絕壑是遊人請燈處僧云

燈非禱不見是日不禱而光景明滅頃刻異狀諸生或
疑其妄予謂僧言則妄而此光不可誣豈地氣之盛而

然耶深尋兩林間清波貫華屋蓮社有遺蹤草堂非舊築

修廊餘古刻好醜雜珉玉亦復記經行深慙後人讀
日五

下山至東西林兩寺相去不百步一溪清駛橫貫其間
皆自方丈前南廡下過他處所無有也白蓮池在東林
法堂前白公草堂基在寺東久廢近歲復砌數椽制殊
狹陋然亦非其正處矣是日題名屬寺僧刻於咸通莊

田記 行軒復東驚祠城當晚遊胡然冠蓋集不盡心期

幽夜厭百谷喧旦失千峰稠出門有遺恨回首空綢繆

晚至太平興國宮唐九天使者祠也江州教授翁名卿
載酒肴與鄉人遊應和歐景文及其諸生二十餘人皆

至山水誠乃竒云誰究終始曩遠亦何人神君豈其鬼

東西妄采獲誣謫共恢詭百世踵謬訛彞倫日頽圯

東林

慧遠雜取孔老之言以附佛學嘗著沙門不敬王者論
唐明皇自言親見使者降於殿庭因立此宮而羣臣造
為妖妄以迎合者甚衆本朝以茲遊覽富翻令懷抱傷
仍賜宮額神號置提舉官云

誰哉可告語舉俗昏且狂乾坤有真心日月垂休光茫

茫宇宙內此柄孰主張
北度石塘橋西訪濂溪宅
喬木無遺株虛堂唯四壁
竦瞻德容睟跪薦寒流碧
幸矣有斯人渾淪再開闢
平生勞仰止今日登此堂
願以圖像意質之中几
傍先生寂無言賤子涕泗滂
神聽儻不遺

惠我思無疆

六日拜濂溪先生書堂遺像子澄請為諸生說太極圖義先生之曾孫正卿彥卿玄

孫濤為設食於光風霽月之亭明晨江磯寺尊酒聊對設孰是十日遊

遽成千里別英僚樹嘉政素友厲孤節努力莫相忘清

宵共明月

七日薛洪持志王仲傑之才攜酒自南康來飲罷與張陳越南還軍子澄許張歸廬陵南

鄉龜父還家擇之湖
南予與王余陳黃東
度湖口而歸

考異

崇壽客舍

月向

一作月上

歸未得

一作身是客

分韻賦簡寂

迴矚

一作俯矚

誰復

一作復謝

嶺梅

似愁

一作但愁

野梅

風吹

一作風破

愁絕

一作幽絕

小梅

莫嗟

一作莫歎

疎梅

不勝

一作不成

送四十叔父

獨尋

一作獨遊

逢孤

一作尋孤

秘閣張丈長篇

饋思

一作饋念

和張彥輔

失喜

一作勝喜

奉同張丈哭敬夫

喚卜

一作要卜

和白鹿洞

再吐

一作白吐

次棲賢韻

融洽

一作融結

傾耳

一作瀕耳

和陶次韻

吾公

一作吳公

棲賢院三峽橋

脩至

一作脩起

長蛟

一作長虹

溫湯

據地

一作環地

山北紀行

嶽峯

一作嵯峨

孰是

一作云是

晦菴集卷七

欽定四庫全書

晦菴集卷八

宋 朱子 撰

詩

買船至演平拜建康劉公墓下遂入城假館梅
山堂感涕有作

維舟新歷口步上秣陵阡高丘忽嵯峨宿草迷荒烟拜
起淚再滴哀哉不能言驅車且復東借此虛堂眠念昔
堂中人經營幾何年一旦舍之去千秋不言還露井益

清漂風林更修鮮思公獨不見涕下如奔川感慨西州
門愴恨山陽篇晤歎日隱樹悲歌月當軒堂堂忠孝心
終古諒弗諼尚與吳門子歸來故山巔

晚雨涼甚偶得小詩請問遊山之日并請劉平
父作主人二首

幾年不踏仙洲路夢入青藤古木間好趁新秋一番雨
晝寒亭下弄潺湲

廬阜歸來抵短筇解包茶茗粗能供若須載酒邀賓客

付與屏山七老翁

宿密菴分韻賦詩得衣字

不到仙洲歲月移，攜壺特地款巖扉。
已驚素雪清人骨，更喜蒼烟染客衣。
新賞不妨頻徙倚，舊題何事獨噓噓。
明朝驛騎黃塵裏，莫待迷塗始賦歸。

讀子厚步月詩時方聞呂伯恭訃後數日賦此
晚步曲池上，西風吹我裳。
仰觀天宇濶，愛此明月光。
念我素心人，眇焉天一方。
沒者永乖隔，存者為參商。
飄零

金夕日乃之千
卷八
百歲期寂寞幽髻霜還坐三太息高林鬱蒼蒼

次子厚秋懷韻

秋風何方來為我滌殘暑庭梧亦何與索索終夜雨冥
思感物變念此離索苦浩蕩信莫量幽紛那得覩丁年
舍我去憔悴故其所廓落濟時心頽然復安取永懷平
生友夢想見眉宇今晨枉秀句爛若朝霞舉去去同采
芝高軒坐凝佇

黎嶺西南水石佳處不減廬阜戲呈子厚

谷深石瘦水潺潺便是楞伽折桂間
珍重下邳圯上客
一年幾度到廬山

讀子厚詩卷用其卒章晨起之韻作詩寄之

晝永倦殘暑宵分喜新涼
天雞一振翼爛爛曉月光
病榻感虛徐中庭起翱翔
懷哉穀城子物外久不忙
掩抑琴調希激烈歌聲長
契闊恨清賞佳期未渠央
緘詞託歸鳥側佇何能忘

登廬峰

金
卷八
循磻躋危磴披雲得勝遊蓬茅增舊葺竹樹喜新稠
夢想三秋別徘徊十日留餘年端可料此地欲長休

佳友紛來集欣然會宿心風前陪徙倚雲月共窺臨雅
唱情俱勝微言思獨深茲遊非逸豫邂逅得良箴

廬峰次韻

澗水流千仞巖姿起萬般扶藜雖有興駐屐諒難安
好客能同趣羣峰肯縱觀蒼茫却無際誰與話愁端

次瑞泉詩韻

興懷來賞趣對景却忘言偶與同遊客行逢幽澗原淺
泓排積腐暗竇溢流渾終待寒泉食無憂水鏡昏

五禽言和王仲衡尚書

提胡蘆沽美酒春風浩蕩吹花柳不用沙頭雙玉瓶鳥
歌蝶舞為君壽祇今爛醉是君恩昨日之愁愁殺人
不如歸去孤城越絕三春暮故山只在白雲間望極雲
深不知處不如歸去不如歸千仞岡頭一振衣

泥滑滑泥滑滑秦望雲荒鏡湖闊綠秧刺水水拍堤牙

旗畫舸凌風發使君行樂三江頭
泥滑水深君莫憂
脫袴脫袴桑葉陰陰墻下路
回頭忽憶舍中妻
去年已逐它人去
舊袴脫了却不辭
新袴知教阿誰做

麥熟吟去年種麥有德音
祇今種熟誰快活
種者已卧官墻陰
仁公有政惠存歿
肯使催租更隳突

酬黃子厚見訪歸途惠詩韻

櫪驥倦千里籠鶴思九臯
念昔田舍日不知山林高一
朝逢世紛故丘得潛逃
平生棲遁志茲焉始堅牢
故人

穀城翁高情北窓陶亦復喜我歸巾車歛林巢申旦更
離閣中情重怆怆

遊密菴分韻賦詩得清字

誤落塵中歲序驚歸來猶幸此身輕便將舊友尋山去
更喜新詩取意成暖翠乍看渾欲滴寒流重聽不勝清
箇中有趣無人會琴罷尊空月四更

遊密菴得空字

欲覓仙洲路須乘萬里風飲泉雲出岫卧嶺月流空永

夜渾無寐悲歌莫與同起來殘樹影清絕小樓東

昨為許進之書胎仙字因以名其室或疑欠舞
字者故作此以解之

寒山寒月冷颼颼隻影孤桐萬里遊帝樂夢回三疊遠
胎仙舞罷一簾秋未愁悄寂無人會只恐蹁躑不自休
却笑蓋珠何處所兩忘蝴蝶與莊周

正月五日欲用斜川故事結客載酒過伯休新
居風雨不果二月五日始克踐約坐間以陶公

卒章二十字分韻熹得中字賦呈諸同遊者

玄景彫暮節青陽變暄風忽尋斜川句感此勝日逢駕
言當出遊一寫浩蕩胸雲物疑異候淒迷久連空今朝
復何朝頓覺芳景融疇曩庶復踐隣曲歡來同伊雅一
籃輿連翩數枝筇綠野生遠思清川照衰容遙瞻西山
足突兀彌畝宮庭宇豁清曠林園鬱青葱於馬一逍遙
芳樽間鳴桐既爵日樹隱班荆汀草豐纖鱗動微波新
萋冠幽叢惆悵景易晏徘徊思無窮願書今日懷遠寄

柴桑翁仰止固窮節愧茲百年中

次呂季克東堂九詠

野塘小隱

傳得希夷九卦圖歸來不復夢榮途
野塘竟日無人到
讀盡床頭種樹書

敬義堂

高臺巨榜意何如住此知非小丈夫
浩氣擴充無內外
肯誇心月夜同孤

方拙寮

一室歸來萬事新
窓前橫竹掛朝紳
九流未讓園機士
四海寧慙巧宦人

吟哦室

蒲團竹几睡曹騰
客問君今幾折肱
身世兩忘無可答
起尋詩句遶階行

愛蓮

聞道移根玉井旁
開花十丈是尋常
月明露冷無人見

獨為先生引興長

月臺

臺上無人伴苦吟
歸鴉過盡日西沉
須臾玉匣開塵鏡
却有孤光共此心

菜畦

雨餘菜甲翠光勻
杞菊成畦亦自春
骨相定知非食肉
可能長笑箇中人

海棠屏

蜀樹成行翠作圍
花開時節更芳菲
主人夢亦尋春去
栩栩深穿錦障飛

橘堤

君家池上幾時栽
千樹玲瓏亦富哉
荷盡菊殘秋欲老
一年佳處眼中來

挽吳給事三首

臺省傾羣望江湖去一麾
語聞三諫切政有百年思
不盡雲龍會還尋霧豹期
誰知七休詠翻入八哀詩

粵自辭神武超然絕世紛前身疏太傅今日范忠文圃
樹寒留月湖波冷浸雲懸知千載下此地想遺芬

憶昔觀風寄登堂識老成忘年見交態把酒話詩情別
去如三歲書來忽九京却思憑檻語忍遽勒公銘

伏讀雲臺壁間秘閣郎中盤谷傳文題詩齒及
賤名追懷曩昔不勝感涕輒次元韻呈諸同遊
計亦同此歎也

提攜當日忝忘年曾向瑕丘獨請前喜看玄雲生素壁

恍疑後學廁先賢公遊汗漫今何許我病摧頽人自憐

只有空山無歲月倚天寒木但蒼然

是日景仁景初二
兄行視卜宅亦宿

山間謹并錄呈
尤劇悲愴耳

次韻寄題萬頃寒光奉呈休齋先生

閑將歲月老烟汀更遣詩情到杳冥遊子故應悲舊國
壯懷那肯泣新亭一官避世今頭白萬卷收功久汗青
但見潮生與潮落不知沉醉又還醒

熹伏蒙休齋先生惠詩見留謹次高韻二首

忽驚蕭颯鬢毛秋起向東山覓舊遊盤谷門前淚沾臆
雲臺溪上雪蒙頭歸歎吾黨又千里老矣心期但一丘
珍重休齋書滿屋可無三宿為君留

望望西山日幾回更憐一雨洗浮埃遠遊莫說雲門寺
往事聊尋單父臺雞犬蕭疎迷洞口交親零落半巖隈
尊前見在君須關速上籃輿相逐來

用林擇之韻別陳休齋

別離不覺歲時侵兩地相望共此心今日還成一尊酒

它年應記百篇吟傷情後會無期定握手交情有舊深
多謝晚風知此意不催寒日下疎林

奉酬九日東峰道人溥公見贈之作

幾年回首夢雲關此日重來兩鬢斑點檢梁間新歲月
招呼臺上舊溪山三生漫說終無據萬法由來本自閑
一笑支郎又相惱新詩不落語言間

和林擇之鳳凰山韻

木落髻鬟擁湖平粒鏡空荒亡餘舊事慘澹只悲風興

發千山裏詩成一笑中諸君莫惆悵吾道固當窮

次林擇之涼峰韻

解轡林間寺歸鴉晚欲盤望中嵐翠合愁外夕陽殘尊
酒何妨盡羈心且自寬無端滿窓月遙夜不勝寒

熹去溫陵二十七年而復來顯菴益老見候七
里亭又以佳句見招而休齋陳丈寺丞黃丈皆
屬和焉因次韻奉酬并呈二丈

不因辭吏役那得解天刑故國重來遠寒山依舊青興

懷感陳迹舉目愴新亭尚喜灣頭老禪房喜扣扃

答黃叔張

日君趨玉陛抗疏肅邦刑便有榮褒袞無勞涕伏青衆
流爭靡靡一柱獨亭亭只恐追鋒急那容晝揜扃

次韻陳休齋蓮華峰之作

八石天開勢絕攀算來未似此心頑已吞繚白縈青外
依舊箇中雲夢寬

次黃叔張宿涼峰韻

齒苞含跗天外秀婆娑散影月中孤惜無畫手追前輩
寫就涼峰憇寂圖

至鳳凰山再作

門前寒水青銅闕林外晴峰紫帽孤記得南垞通柳浪
依稀全是輞川圖

見梅用攀字韻

年來羞把玉梅攀萬樹爭春我獨頑只有顛狂無告訴
詩腸欲斷酒腸寬

次韻陳休齋懷古堂

平昔塵編裏心期本自幽
那堪舊泉石更作此追遊
好句看猶在遺忠愴已休
亦知今日意不逐大江流

寄題九日山廓然亭

昨遊九日山散髮巖上石
仰看天宇近俯歎塵境窄
歸來今歲時夢想掛蒼壁
聞公結茅地恍復記疇昔
年隨流水逝事與浮雲失了
知廓然處初不從外得
遙憐植杖翁鶴骨雙眼碧
永歎月明中秋風桂花白

用林擇之韻呈陳福公

昔公秉鈞衡金玉我王度中年幾湖海偃息安國步歸
然九鼎重翩若孤雲去俯仰天地間誰哉此同趣

用前韻答方直甫

小儒談大方任意畧權度未行要疾走踉蹌不成步唯
應過量人不作與麼去請君敞書帷為我說歸趣

用前韻答林史君

十年劇傾馳此日際風度胡然龔黃最未接夔龍步詩

成肯遽休客醉那得去却恐驛書來湖山適成趣

題君子亭

清晨坐武觀涼風動高旌挾弓一笑起屈此四座英破
的亦已屢穿楊詎云精軍吏不敢賀高鳥時相驚解鞬
脫決遂緩帶飄華纓俯仰新亭幽曠然塵慮清內正外
自直三揖奚所爭端居得深玩君子非虛名

伏承侍郎使君垂示所與少傅國公唱酬西湖
佳句謹次高韻聊發一笑二首

百年地闢有奇功，創見猶驚鶴髮翁。
共喜安車迎國老，更傳佳句走郵童。
閒來且看湖頭入，樂事寧憂酒觥空。
會見台星與卿月，交光齊照廣寒宮。

越王城下水融融，此樂從今與衆同。
滿眼芰荷方永日，轉頭禾黍便西風。
湖光盡處天容闊，潮信來時海氣通。
酬唱不誇風物好，一心憂國願年豐。

伏承子直都督侍郎臨餞，遠郊仍邀嚴州郎中
及諸名勝相與燕集，分韻賦詩，熹得時字，輒成

鄙句

芳歲修云宴故山風雪時胡為在中路復此行遲遲為
有賢主人愛客情依依昨夕西門道終宴不能辭今朝
復何朝祖帳遙相追賓從俱俊賢車馬有光輝敞扉得
華觀俯檻臨清池南州淑氣多蕩節佳景隨雪樹雖改
色青山正含姿

朱氏園外谷中有梅近百株是日花落已盡

近開樽酌春醪授

簡哦新詩但覺四座驩不知寸晷移流雲暗寒空蒼烟
染人衣相看暮色至我去公當歸別袖不忍分扣扣陳

苦詞願公崇令德慰我渴與飢

臘月九日晚發懷安公父教授壽翁知丞載酒
為別而元禮景嵩子木擇之廷老考叔舜民諸
賢相與同舟乘便風頃刻數十里江空月明飲
酒樂甚因以星垂平野闊月湧大江流分韻熹
得星字醉中別去乃得數語畧紀一時之勝云

掛帆望烟渚整棹別津亭風水已云便我行安得停離

樽枉羣賢濁醪愧先傾

二公厨船未至先飲舟中餘尊

談笑不知遠但

覺江流清

江水上流接建劍溪湖所不及水益清駛

獵獵甘蔗洲茫茫白沙

汀斯須復回首祇有遙山青

甘蔗白沙兩地名相去十許里頃刻而過

野色

一以暝川光晶孤明中流漾華月極浦涵疎星酒酣客
散歸茫然獨宵征起視天宇闊此身一浮萍難追五湖
遊未願三閭醒且詠招隱作孤舟轉玲峴

伏蒙制置閣學侍郎示及致政少傅相公送行
長句并得竊窺酬和佳篇伏讀之餘不勝慰幸
謹次高韻少見愚悃以餞車塵伏惟采矚二首

公子威名動海濱四年相與愧情親忽聞黃鉞分全蜀

更祝彤庭列九賓

公以上章請對

執手便驚成契闊贈言還喜

和陽春政成但祝歸來早別恨無端莫重陳

地兼梁益盛中權自昔疇咨出萬全定喜封章來活國

故煩伏軾去籌邊

公去歲嘗有密疏上賜手札褒論

軍民傳詔歡聲溢

婦女迎門巧笑妍要答君恩與人望可無清教速初筵

諸葛武侯初領益州收發教與羣下曰夫參署者集衆思廣忠益也若遠小嫌難相違覆曠闕損矣違覆而得中猶棄敝躡而獲珠玉然人心若不能盡惟徐元直處茲不惑又董幼宰參署七年事有不至至于十反來相

啟告苟能慕元直之十一幼宰之勤渠有忠於國則亮
可以少過矣又曰昔初交州平屢聞得失後交元直勤
見啟告前參事於幼宰每言必盡後從事於偉度數有
諫止雖資性鄙暗不能盡納然與四子終始好合亦足
以明其不疑
於直言矣

伏讀致政少傅相公送趙成都佳句兩篇不勝
慰幸已次高韻并餞其行而再賦此章以見區
區瞻仰之意繕錄拜呈伏乞采覽二首

歸來寂寞卧漳濱夢想威容阻再親綠野遙聞花欲語
亦書還喜雁來賓間中有句人爭誦妙處無心物自春

行馬不明吾輩設胸竒猶得話陳陳

一旦高辭將相權身名從此慶雙全人誇迹已風塵外
誰道心遊日月邊未許前賢專晚節更將餘事發春妍
君王若要詢黃髮便好臨雍促肆筵

送彥集之官瀏陽

急景彫暮節高風振空林病夫掩關卧長謠擁孤衾聞
君千里行四牡方駸駸重此別離感青天欲愁陰君行
豈不勞民瘼亦已深催科處處急椎鑿年年侵君行寬

彼忙足以慰我心薦書會滿篋社酒還同斟所念家同
產與君如瑟琴茲焉不並駕宰木寒蕭慘尚喜吾諸甥
男恭女知欽明朝復相憶悵望楚山岑

次劉正之芙蓉韻三首

淺綠深紅出短籬望中都是可憐枝要看亂颭寒塘水
更待金風滿意吹

凌波直欲渡橫塘却愛無人獨自芳且倚新漪閒照影
更憑女伴一扶將

微吟澤畔幾扶筇自笑摧頽一秃翁羞見芙蓉好顏色
且憑詩律傲西風

考異

晚雨涼甚

賓客

一作
賓去

付與

一作
分付

吟哦室

兩忘

一作
相思

休齊惠詩次韻

忽驚蕭颯

一作還
家不覺

老矣

一作
老去

珍重

一作
見說

三宿

一作
三日

望望

一作
悵望

懷遊

一作
勝遊

蕭疎

一作
涼悲

見在

一作
有酒

速上

一作
好上

逐來

一作
趣來

至鳳凰山再作

銅闕

一作
銅闕

次韻懷古堂

已休

一作未休

寄題廓然亭

俯歎

一作俯視

用擇之韻呈福公

誰哉

一作懷哉

次韻芙蓉

扶筇

一作杖筇



晦庵集卷八